



O'ZBEKISTON RESPUBLIKASI PREZIDENTINING QARORI

2022 yil « 7 » май

№ПК-237

Халқаро қишлоқ хўжалиги университетини ташкил қилиш чора-тадбирлари тўғрисида

Ўзбекистон Республикаси қишлоқ хўжалигини ривожлантиришнинг 2020–2030 йилларга мўлжалланган стратегияси ижросидан келиб чиқиб, қишлоқ хўжалигида билим ва инновациялар тизими доирасида аграр соҳа учун халқаро талаб ва стандартларга мувофиқ юқори малакали кадрлар тайёрлаш, бу борада етакчи хорижий университетлар билан ўзоқ муддатли муносабатларни ривожлантириш мақсадида:

1. Қишлоқ хўжалиги вазирлигининг Буюк Британия Қироллик қишлоқ хўжалиги университети (Royal Agriculture University, кейинги ўринларда – ҳамкор университет) билан ҳамкорликда Тошкент шаҳрида **Халқаро қишлоқ хўжалиги университетини** (кейинги ўринларда – Университет) ташкил этиш тўғрисидаги ташаббуси қўллаб-қувватлансин.

2. Қуйидагилар маълумот учун қабул қилинсин:

а) Университет фаолиятининг асосий йўналишлари этиб қуйидагилар белгиланганлиги:

аграр соҳани ривожлантириш, жаҳон тенденцияларини ва тажрибасини акс эттиришга мослашган **“илмга асосланган, амалиётга йўналтирилган** (science-based, practice-oriented) **таълим”** тамойили **асосида** ва миллий анъаналар уйғунлигида юқори малакали, замонавий билим ва кўникмаларга эга, мустақил фикрлайдиган, ватанпарвар, профессионал кадрларни тайёрлаш;

илм-фан ютуқлари ва инновацияларни ишлаб чиқаришга татбиқ этиш, **агротехнология ва экологик барқарорлик амалиётларини ривожлантириш**, қишлоқ хўжалигида бизнес ва оператив самарадорликни ишлаб чиқишни қамраб оладиган илмий тадқиқотлар олиб бориш;

қишлоқ хўжалиги ходимларини **қайта тайёрлаш** ва уларнинг **малакасини ошириш** ҳамда ўқув тизимини модернизация қилишга қаратилган **янги таълим дастурларини** ишлаб чиқиш ва жорий этиш;

хорижий олий таълим муассасалари ва ташкилотлар билан **ўзаро ҳамкорлик ўрнатиш, қўшма таълим дастурлари ва лойиҳаларни амалга ошириш**;

б) Университет битирувчиларига **ҳамкор университетнинг дипломи** берилади.

3. Белгилаб қўйилсинки:

Университет Қишлоқ хўжалиги вазирлиги ва Буюк Британия Қироллик қишлоқ хўжалиги университети томонидан таъсис этиладиган тўлиқ академик ва молиявий мустақил бўлган давлат иштирокидаги олий таълим муассасаси ҳисобланади;

Университет Ўзбекистон Республикаси Давлат герби тасвири ва давлат тилида номи туширилган муҳр, банк ҳисобварақлари, штамп ва бошқа реквизитларга эга бўлади;

Университет томонидан бериладиган диплом Ўзбекистон Республикасида тан олинади;

Университетда таълим **грант** ва **тўлов-контракт** асосида амалга оширилади;

Университет жалб этилган хорижий мутахассислар, маҳаллий ходимларнинг иш ҳақи ва бошқа тўловлар миқдорини мустақил белгилайди;

Университет ректори Кузатув кенгаши билан келишган ҳолда қишлоқ хўжалиги вазири томонидан лавозимга тайинланади ва лавозимидан озод қилинади. Бунда, Университет ректори Ўзбекистон Республикаси томонидан кўрсатилади.

4. Университетга Ўзбекистон Республикаси Президентининг 2021 йил 24 декабрдаги “Давлат олий таълим муассасаларининг академик ва ташкилий-бошқарув мустақиллигини таъминлаш бўйича қўшимча чора-тадбирлар тўғрисида”ги ПҚ–60-сон ва “Давлат олий таълим муассасаларига молиявий мустақиллик бериш чора-тадбирлари тўғрисида”ги ПҚ–61-сон қарорларида **белгиланган академик, молиявий ва ташкилий мустақилликка оид тартиб-таомиллар татбиқ қилинади.**

5. Қишлоқ хўжалиги вазирлиги, Олий ва ўрта махсус таълим вазирлиги, Таълим сифатини назорат қилиш давлат инспекциясининг Университетда давлат муассасаси шаклидаги хўжалик ҳисобидан молиялаштириладиган Қишлоқ хўжалиги соҳасида кадрларни қайта тайёрлаш ва уларнинг малакасини ошириш тармоқ маркази (Capacity Building Center)ни ташкил этиш тўғрисидаги таклифи маъқуллансин.

Қуйидагилар Марказнинг асосий вазифалари этиб белгилансин:

давлат ва хусусий секторда фаолият юритувчи соҳа вакиллари, шунингдек, фермер хўжаликлари, кластерлар раҳбарлари ва мутахассисларини хорижий тажрибалар асосида қайта тайёрлаш ва уларнинг малакасини оширишни ташкил этиш;

маҳаллий қишлоқ хўжалигига ихтисослашган олий ва профессионал таълим муассасалари ҳамда илмий-тадқиқот институтларида илмий салоҳиятни юксалтиришга ҳисса қўшиш, жумладан, тадқиқотчилар учун замонавий тадқиқотлар олиб бориш ва нүфузли журналларда мақолалар чоп этишни қўллаб-қувватловчи ўқув курслари ташкил этиш;

халқаро тенденцияларни ҳисобга олган ҳолда манфаатдор томонларнинг эҳтиёжларини аниқлаш учун доимий тадқиқотлар ва илмий изланишлар олиб бориш.

6. Қишлоқ хўжалиги вазирлиги 2022 йил якунига қадар Университетда халқаро молия институтларининг маблағлари ҳисобидан молиялаштириладиган талабалар, магистрант ва илмий изланувчилар ҳамда профессор-ўқитувчиларнинг илмий ишланмалари асосида стартап-лойиҳаларни яратиш ва амалиётга татбиқ этиш билан шуғулланувчи давлат муассасаси шаклидаги “Agro Innovation Incubator” марказини ташкил этсин.

7. Халқаро қишлоқ хўжалиги университетининг Кузатув кенгаши таркиби 1-иловага мувофиқ тасдиқлансин ҳамда унинг ваколатлари этиб қуйидагилар белгилансин:

Университетга талабаларни қабул қилиш параметрларини, Университетдаги таълим шакли, тури ва тилини белгилаш;

Университетда янги бакалавриат таълим йўналишлари ва магистратура мутахассисликларини, шунингдек, олий таълимдан кейинги таълим бўйича докторантура ихтисосликларини очиш;

Университет раҳбарияти ва ходимлари ҳамда профессор-ўқитувчиларини ишга қабул қилиш тартибини белгилаш, шунингдек, уларнинг фаолиятига баҳо бериш, улар фаолиятининг самарадорлигини баҳолаш мезонларини (KPI) тасдиқлаш;

хорижий ва маҳаллий етакчи олий таълим муассасалари билан талабаларнинг **академик мобиллигини таъминлаш** ҳамда **қўшма таълим дастурларини** жорий этиш;

Университетни ривожлантиришнинг **ўрта ва узоқ муддатли стратегик** режаларини тасдиқлаш;

бакалавриат, магистратура ва докторантурага қабул қилиш шартларини, шунингдек, талабаларни ўқишга қабул қилишда тест синовлари топшириладиган фанлар мажмуасини ва ўқиш учун **тўлов миқдорини белгилаш**;

Университетнинг ўрта муддат учун шакллантириладиган бизнес-режаси ҳамда **даромадлар** ва **харажатлар параметрларини тасдиқлаш**, уларнинг ижросини муҳокама қилиш;

Университетнинг **ички аудит** ва **молиявий назорат** хизматига молиявий назорат ўтказиш бўйича қўшимча топшириқ бериш ҳамда назорат тадбирларининг натижаси юзасидан **ҳисобот олиш**;

қонунчилик ҳужжатларида белгиланган бошқа ваколатларни амалга ошириш.

8. Университет фаолиятини самарали ташкил этиш мақсадида Халқаро қишлоқ хўжалиги университети фаолиятини йўлга қўйиш бўйича “йўл харитаси” **2-иловага мувофиқ** тасдиқлансин.

9. Қуйидагилар **Университет фаолиятини молиялаштириш манбалари** этиб белгилансин:

Европа Иттифоқининг қишлоқ хўжалиги соҳаси учун бюджет кўмаги дастуридан **6 млн АҚШ** доллари миқдоридаги ва **Жаҳон банкининг** **11 млн АҚШ** доллари миқдоридаги маблағлари;

талабаларни тўлов-контракт асосида ўқитишдан тушадиган маблағлар;

хўжалик, илмий фаолият ва шартнома асосида хизматлар кўрсатишдан тушадиган маблағлар, юридик ва жисмоний шахсларнинг ҳомийлик хайриялари;

халқаро молия ташкилотларининг грантлари ва муассислар маблағлари ҳамда қонунчилик ҳужжатлари билан тақиқланмаган бошқа манбалар.

10. 2022/2023 ўқув йилидан бошлаб Халқаро қишлоқ хўжалиги университетида ташкил этиладиган бакалавриат таълим йўналишлари **3-иловага** мувофиқ тасдиқлансин.

11. Қишлоқ хўжалиги вазирлиги (Ж.Ходжаев):

а) бир ой муддатда Университет уставининг тасдиқланиши ва унинг давлат рўйхатидан ўтказилишини таъминласин. Бунда:

хорижий олий таълим муассасалари билан тузилган келишувлар асосида ўзаро манфаатли алоқаларни йўлга қўйсин;

Олий ва ўрта махсус таълим вазирлиги билан биргаликда 2022/2023 ўқув йили учун қабул жараёнини ташкил этсин;

Университетнинг вақтинчалик биносини реконструкция қилиш ва жиҳозлаш лойиҳасини ишлаб чиқсин, ўрнатилган тартибда давлат экспертизасидан ўтказсин ҳамда халқаро молия институтларининг грант маблағлари ҳисобидан бинода таъмирлаш-қурилиш ишларини ташкиллаштирасин;

зарур бўлган ўқув, илмий лабораториялар, ўқув адабиётлари рўйхатини шакллантирсин ва харидини ташкил этиш чораларини кўрсин;

Университетни ташкил этиш даврида унинг фаолиятини йўлга қўйиш билан боғлиқ ташкилий, юридик, иқтисодий, ўқув-ўқувий, илмий-тадқиқот, моддий-техник ва бошқа масалаларни ҳал этишда кўмаклашсин;

б) уч ой муддатда:

Европа Иттифоқининг қишлоқ хўжалиги соҳаси учун бюджет кўмаги дастуридан **300 минг АҚШ доллари миқдоридаги** маблағларни жалб этган ҳолда етакчи хорижий олий таълим муассасалари билан Университет профессор-ўқитувчиларини қисқа муддатли қайта тайёрлаш ва уларнинг малакасини ошириш мақсадида битимларни имзоласин;

соҳа мутахассисларини, шунингдек, фермер хўжаликлари, кластерлар раҳбарлари ва мутахассисларини қайта тайёрлаш ва уларнинг малакасини ошириш тартибини тасдиқласин;

Қишлоқ хўжалиги соҳасидаги кадрларни халқаро стандартлар бўйича қисқа муддатли профессионал ўқитиш курслари тўғрисидаги низомни тасдиқласин;

в) Қишлоқ хўжалиги соҳасида **кадрларни қайта тайёрлаш** ва **уларнинг малакасини ошириш** тармоқ маркази тўғрисидаги низомни тасдиқласин ва унинг фаолиятини 2023/2024 ўқув йилидан бошлаб йўлга қўйсин;

г) **2024/2025 ўқув йилига қадар** халқаро молия институтларининг грант маблағлари ҳисобидан етакчи лойиҳа ва пудратчи компанияларни жалб этган ҳолда Университет янги ўқув кампуси қурилишини таъминласин.

12. Қишлоқ хўжалиги вазирлиги, Инновацион ривожланиш вазирлиги ва Олий аттестация комиссиясининг 2023 йил 1 январдан бошлаб Университет илмий салоҳиятини ошириш учун белгиланган тартибда ихтисослашган илмий кенгаш тузиш тўғрисидаги таклифига розилик берилсин.

Бунда, ихтисослашган илмий кенгаш аъзоларининг **50 фоизи** халқаро ҳамкорлар ва хорижий ватандошлар орасидан танланади.

13. Қишлоқ хўжалиги вазирлиги Университетни Тошкент вилояти, Қибрай тумани, Салар шаҳарчаси, Университет кўчаси, 2-уй манзилига оператив бошқарув ҳуқуқи асосида жойлаштирсин.

Янги бино қурилгунга қадар Университетга Тошкент давлат аграр университетининг спорт мажмуаси, талабалар турар жойи ҳамда ўқув лабораторияларидан вақтинча фойдаланишга рухсат берилсин.

14. Ташқи ишлар вазирлиги Қишлоқ хўжалиги вазирлигининг виза талабномаларига биноан Университетга таклиф қилинадиган чет эллик профессор-ўқитувчилар, мутахассислар ҳамда уларнинг оила аъзолари учун кириш визалари консуллик йиғимлари ва ҳақиқий харажатларнинг ўрнини қоплаш ҳисобидан йиғимлар ундирилмасдан расмийлаштирилишини таъминласин.

15. Қишлоқ хўжалиги вазирлиги (Ж.Ходжаев) Олий ва ўрта махсус таълим вазирлиги (А.Тошқулов) билан биргаликда ҳудудларда Университет фаолияти ва 2022/2023 ўқув йили учун қабулни самарали ташкил этиш мақсадида тарғибот ишларини амалга оширсин.

16. “Эл-юрт умиди” жамғармаси Қишлоқ хўжалиги вазирлиги (Ж.Ходжаев) билан биргаликда **Университетнинг маҳаллий профессор-ўқитувчилари**, магистрантлари ва талабаларини “Эл-юрт умиди” жамғармаси ҳисобидан хорижий етакчи олий таълим ва илмий-тадқиқот муассасаларига малака ошириш, стажировка ва ўқишга юбориш чораларини кўрсин.

17. Ўзбекистон Миллий телерадиокомпанияси, Ўзбекистон Миллий ахборот агентлигига мазкур қарорнинг мазмун-моҳиятини, қишлоқ хўжалигида билим ва инновациялар тизими доирасида аграр соҳа учун халқаро талаб ва стандартларга мувофиқ юқори малакали кадрлар тайёрлаш бўйича амалга оширилаётган ислохотларни атрофлича ёритиб бориш тавсия этилсин.

18. Қишлоқ хўжалиги вазирлиги манфаатдор вазирлик ва идоралар билан биргаликда **икки ой муддатда** қонунчилик ҳужжатларига ушбу қарордан келиб чиқадиган ўзгартириш ва қўшимчалар тўғрисида Вазирлар Маҳкамасига таклифлар киритсин.

19. Мазкур қарорнинг ижросини самарали ташкил қилишга **масъул** ва **шахсий жавобгар** этиб қишлоқ хўжалиги вазири Ж.А.Ходжаев белгилансин.

Мазкур қарор ижросини **ҳар чоракда** муҳокама қилиб бориш, ижро учун масъул идоралар фаолиятини мувофиқлаштириш ва назорат қилиш Бош вазир ўринбосари Ш.М. Ғаниев зиммасига юклансин.

Ўзбекистон Республикаси
Президенти



Ш. Мирзиёев

Тошкент шаҳри

Ўзбекистон Республикаси Президентининг
2022 йил 7 майдаги ПҚ–237-сон қарорига
1-илова

**Халқаро қишлоқ хўжалиги университетининг Кузатув кенгаши
ТАРКИБИ**

- | | |
|---------------------------------|--|
| 1. Жамшид Ходжаев | – қишлоқ хўжалиги вазири – <i>Кузатув кенгаши раиси</i> |
| 2. Алишер Шукуров | – қишлоқ хўжалиги вазири маслаҳатчиси – <i>Кузатув кенгаши раиси ўринбосари</i> |
| 3. Илхом Норқулов | – иқтисодий тараққиёт ва камбағалликни қисқартириш вазирининг биринчи ўринбосари |
| 4. Рахимжон Хакимов | – олий ва ўрта махсус таълим вазири ўринбосари |
| 5. Алишер Тўраев | – қишлоқ хўжалиги вазири ўринбосари – Қишлоқ хўжалигида билим ва инновациялар миллий маркази бош директори |
| 6. Нго Бунтан | – Қишлоқ хўжалиги қироллик университети ректори (Royal University of Agriculture, Буюк Британия) (келишув асосида) |
| 7. Йозас Аугутис | – Буюк Витовт университети ректори (Vytautas Magnus University, Литва) (келишув асосида) |
| 8. Хосе Хулиан Гардэ Лорез-Бреа | – Кастилия Ла-Манча университети ректори (University of Castilla-La Mancha, Испания) (келишув асосида) |
| 9. Алан Франс | – таълим бўйича Буюк британиялик халқаро эксперт (келишув асосида) |
| 10. (келишув асосида) | – агрокластерлар ва қишлоқ хўжалиги кооперациялари раҳбарлари |
| 11. (келишув асосида) | – Халқаро қишлоқ хўжалиги университети ректори – <i>Кузатув кенгаши котиби</i> |

Изоҳ: Кузатув кенгаши таркибига қишлоқ хўжалиги вазири томонидан ўзгартириш ва қўшимчалар киритилиши мумкин.

Ўзбекистон Республикаси Президентининг
2022 йил 7 майдаги ПҚ–237-сон қарорига
2-илова

**Халқаро қишлоқ хўжалиги университети фаолиятини йўлга қўйиш бўйича
“ЙЎЛ ХАРИТАСИ”**

Т/р	Чора-тадбирлар	Амалга ошириш механизми	Бажариш муддати	Молиялаш- тириш манбалари	Ижро учун масъуллар
I. Университетни ташкил этиш бўйича амалга ошириладиган чора-тадбирлар					
1.	Университетни ташкил этиш юзасидан хорижий олий таълим муассасалари билан ҳамкорлик ўрнатиш.	Буюк Британия, Литва, Испания ва бошқа давлатларнинг етакчи олий таълим муассасалари билан музокаралар олиб бориш ва улар билан узоқ муддатли келишувларни тузиш.	2022 йил июнь	–	Қишлоқ хўжалиги вазирлиги (Ходжаев), Олий ва ўрта махсус таълим вазирлиги (Тошқулов), Ташқи ишлар вазирлиги (Норов)
2.	Халқаро қишлоқ хўжалиги университетини (кейинги ўринларда — Университет) ташкил этиш.	Университет уставини ишлаб чиқиш, тасдиқлаш ҳамда уни белгиланган тартибда давлат рўйхатидан ўтказиш. Университет тузилмасини шакллантириш ва тасдиқлаш.	2022 йил июнь	–	Қишлоқ хўжалиги вазирлиги (Ходжаев), Олий ва ўрта махсус таълим вазирлиги (Тошқулов)
3.	Университетни юқори касбий маҳоратга эга бўлган тажрибали ва малакали мутахассислар билан тўлдириш.	Хорижий ва маҳаллий малакали мутахассислар (профессор-ўқитувчилар)ни очик танлов асосида саралаб олиш.	2022 йил июнь–октябрь	–	Қишлоқ хўжалиги вазирлиги (Ходжаев)
4.	Талабаларни қабул қилиш жараёнини ташкил этиш.	Университетнинг таълим йўналишлари ва мутахассисликлари кесимида қабул параметрларини белгилаш; кириш имтиҳонларига тайёргарлик кўриш; кириш имтиҳонларини ўтказиш ва талабаларни ўқишга қабул қилиш.	2022 йил август–октябрь	Европа Иттифоқи (ЕИ) ва Жаҳон банки маблағлари	Қишлоқ хўжалиги вазирлиги (Ходжаев), Олий ва ўрта махсус таълим вазирлиги (Тошқулов)

Т/р	Чора-тадбирлар	Амалга ошириш механизми	Бажариш муддати	Молиялаш-тириш манбалари	Ижро учун масъуллар
II. Ўқув жараёнларини самарали ташкил этиш					
5.	Университетда ўқув жараёнларини ташкил этиш билан боғлиқ меъёрий ҳужжатларни ишлаб чиқиш ва тасдиқлаш.	Таълим йўналишларини белгилаш, ўқув режалари ва ўқув дастурларини тасдиқлаш ҳамда ўқитиш муддатлари ва талабаларнинг ўқув машғулотида қатнашиш тартибини белгилаш.	2022 йил август–октябрь	–	Қишлоқ хўжалиги вазирлиги (Ходжаев)
6.	Таълим сифатини ва илмий тадқиқотлар натижадорлигини ошириш мақсадида Университетни замонавий ўқув-лаборатория жиҳозлари, зарурий алоқа, ахборот, транспорт ва бошқа воситалар билан таъминлаш.	Ташкилий чора-тадбирлар.	Режа-график асосида	ЕИ ва Жаҳон банки маблағлари	Қишлоқ хўжалиги вазирлиги (Ходжаев)
7.	Таълим жараёни учун ўқув адабиётларининг янги авлодини яратиш ва жорий этиш ҳамда ахборот-ресурс марказлари фондларини ташкил этиш.	Амалий чора-тадбирлар.	Режа-график асосида	ЕИ ва Жаҳон банки маблағлари	Қишлоқ хўжалиги вазирлиги (Ходжаев)
8.	Хорижий етакчи олий таълим ва илмий муассасалар билан ҳамкорликда халқаро грант лойиҳаларида иштирок этиш.	Комплекс чора-тадбирлар.	Доимий	–	Қишлоқ хўжалиги вазирлиги (Ходжаев), Инновацион ривожланиш вазирлиги (Абдурахмонов)
9.	Университетда ташкил этиладиган ўқув ва илмий-тадқиқот жараёнида хорижий университетларнинг илғор электрон маълумотлар базалари (TOP-DATABASES)дан фойдаланишга шароит яратиш.	Ўқув ва илмий-тадқиқот жараёнини тегишли ўқув-методик, илмий-методик қўлланмалар ва илмий нашрлар билан таъминлаш чораларини кўриш. Талабалар таълим жараёнида фойдаланиши учун илғор электрон маълумотлар базаларига уланиш.	2022 йил октябрь 2022–2023 йиллар	ЕИ ва Жаҳон банки маблағлари ҳамда Университетнинг бюджетдан ташқари маблағлари	Қишлоқ хўжалиги вазирлиги (Ходжаев), Олий ва ўрта махсус таълим вазирлиги (Тошқулов), Инновацион ривожланиш вазирлиги

T/p	Чора-тадбирлар	Амалга ошириш механизми	Бажариш муддати	Молиялаштириш манбалари	Ижро учун масъуллар
		Талабалар учун замонавий, RFID технологияси асосида рақамли кутубхона (Electronic Library Online) ташкил этиш ва уни замонавий ўқув, илмий адабиёт ва ахборот ресурслари билан бойитиб бориш.	Доимий		(Абдурахмонов)
10.	Университет талабаларининг мутахассисликлари бўйича амалий машғулотлар ҳамда малака амалиётларини ташкил этиш.	Ташкилотлар билан талабаларни амалий машғулотлар ва ишлаб чиқаришга бириктириш бўйича шартномалар тузиш. Мазкур шартномаларга мувофиқ амалий машғулотлар ва малака амалиётини ўқув жараёни жадвали асосида ташкил этиш.	2023 йил май Режа асосида	Университетнинг бюджетдан ташқари маблағлари	Қишлоқ хўжалиги вазирлиги (Ходжаев), манфаатдор вазирлик ва идоралар, хўжалик юритувчи субъектлар, илмий-тадқиқот муассасалари
11.	Халқаро ҳамкорлик алоқаларини йўлга қўйиш ва талабаларнинг амалий кўникмаларини ошириш тизимини жорий этиш ва такомиллаштириш.	Халқаро компаниялар ва корхоналарда амалиёт ўташ тизимини жорий этиш. Талабаларни ихтисослик соҳасига амалиёт орқали ўргатиш тизимини жорий этиш.	2023–2024 йиллар	Университетнинг бюджетдан ташқари маблағлари	Қишлоқ хўжалиги вазирлиги (Ходжаев)
III. Университетда халқаро ҳамкорлик ҳамда илмий-инновацион фаолиятни ривожлантириш					
12.	Илмий-инновацион фаолиятни ташкил этиш ва ривожлантириш.	Профессор-ўқитувчилар, илмий тадқиқотчилар ва талабаларни илмий-тадқиқот ишларига жалб қилиш. Олиб борилган илмий-тадқиқот ишлари натижаларини Scopus, Web of Science базасидаги журналларда чоп этиш. Натижаларни ишлаб чиқариш соҳасида амалиётга кенг жорий этиш чораларини кўриш.	Ҳар ўқув йилининг сентябрь – октябрь ойлари Доимий	Университетнинг бюджетдан ташқари маблағлари	Қишлоқ хўжалиги вазирлиги (Ходжаев), Инновацион ривожланиш вазирлиги (Абдурахмонов)

Т/р	Чора-тадбирлар	Амалга ошириш механизми	Бажариш муддати	Молиялаш-тириш манбалари	Ижро учун масъуллар
13.	Университетнинг илмий салоҳиятини ошириб бориш, Университет профессор-ўқитувчиларнинг халқаро илмий семинар ва конференцияларда иштирокини ҳамда қишлоқ хўжалиги соҳасида етакчи хорижий университет, институт ва ақлий марказларда малака оширишини таъминлаш.	Профессор-ўқитувчилар ҳамда иқтидорли талабаларнинг хорижий мамлакатларда ўтказиладиган нуфузли тадбирлар, жумладан, конференциялар, симпозиумлар ва семинарларда мунтазам иштирок этишини таъминлаш. Университетнинг илмий салоҳиятини ошириш учун мутахассислик йўналишларидан келиб чиқиб етакчи олий таълим муассасалари билан ҳамкорликни йўлга қўйиш. Хорижий давлатларнинг университетлари, жумладан, Қироллик қишлоқ хўжалиги университети (Буюк Британия) ва Буюк Витовт университети (Литва) ҳамда илмий марказлар билан биргаликда илмий тадқиқотлар олиб боришни йўлга қўйиш.	2023 йил май ойидан бошлаб доимий	Университетнинг бюджетдан ташқари маблағлари	Қишлоқ хўжалиги вазирлиги (Ходжаев), манфаатдор вазирлик ва идоралар
14.	Университет профессор-ўқитувчилари ва талабалари томонидан яратилган илм-фан ютуқларини доимий равишда тижоратлаштириш ҳамда молиявий ресурсларни жалб этиш ишларини ташкил этиш.	Инновацион ишланмаларни тижоратлаштириш юзасидан илғор хорижий тажрибани ўрганиш. Қишлоқ хўжалиги тармоқлари, агрокластерлар ҳамда озиқ-овқат саноатида ишлаб чиқариш билан боғлиқ фаолият юритадиган корхоналарнинг мавжуд ва келгуси эҳтиёжларини ўрганиб чиқиб, таҳлил қилиш.	Доимий	—	Қишлоқ хўжалиги вазирлиги (Ходжаев), Инновацион ривожланиш вазирлиги (Абдурахмонов), манфаатдор вазирлик ва идоралар

Ўзбекистон Республикаси Президентининг
2022 йил 7 майдаги ПҚ–237-сон қарорига
3-илова

**2022/2023 ўқув йилидан бошлаб Халқаро қишлоқ хўжалиги
университетида ташкил этиладиган бакалавриат таълим йўналишлари**

Т/р	Таълим йўналиши
1.	Ақлли қишлоқ хўжалиги (Smart Agriculture)
2.	Агрономия
3.	Биотехнология
4.	Агроиқтисодиёт
5.	Чорвачиликни ривожлантириш
6.	Озиқ-овқат хавфсизлиги
7.	Агрологистика

Изоҳ: Ўзбекистон Республикаси Қишлоқ хўжалиги вазирлиги ва муассис
билан келишилган ҳолда янги таълим йўналишлари очилиши мумкин.

